

Okungushupaleka iihwa nomiti omithininiki moNamibia

Omahala ogendji guulithilo moNamibia oga hepekwa nayi kiihwa iiyetithina nuulithilo owa shuna pevi noonkondo, oonzo dhomeya gomevi odha nama noshimuke mevi otashi nyanganyangwa. Iihwa nomiti omithininiki dhuulithilo odhi na okuholwa opo oonkondo dhevi dhi tutumuke po, ihe oshinima shika oshi na ondilo. Okukokola po omithininiki otaku pula iimaliwa yomayovi ogendji mohekta nongele okwi ipulwa noofaalama dhopamashingithilo ndhoka oonene noonkondo nena oshilonga shika otashi pula omamiliyona moofaalama yimwe. Aanafaalama aashona lela taa vulu okulongitha iimaliwa moshinima sha tya ngeyika nonando paushili okukokola omithininiki otaku eta uwanawa wethimbo ele. Nonando ongawo, ehlo djiihwa nomiti omithininiki dhuulithilo otali pumbiwa ngele omithininiki ndhoka dha tetwa po, otadhi landithwa po opo ku futwe iilonga mbyoka tayi longwa nenge omuntu i imonene iiyemo ya gwedhwapo pamikalo ngaashi tadhi landula:

Omakala



Okulonga omakala okwo ongeshefa ya kala mo nale muNamibia. Omakala omashona owala haga longithwa meni lyoshilongo nongendji ohaga landithwa pondje yoshilongo, naashika osha ningi Nambia a kale oshilongo oshitano muuyuni oshilandithi oshinene shomakala pondje yoshilongo shono hashi landitha omakala taga tengenekelwa pokati kootona 100 000 no-120 000 komumvo. Omakala ogendji ohaga longekidhilwa moofaalama dhopamashingithilo giimuna, oshihoolelwa, miitopolwa ngaashi Oshaanda, Outjo, Otjiwarongo noKahandja. Omakala ohaga longekidhwa kaaniilonga yomoofaalama e taga landithwa kaalongi yago mboka haye ga longele muushako e taye ga tumu pondje yoshilongo.

Iikulya yiimuna



Iikulya yiimuna ogwo omukalo gwokulonga iikulya tagu opalele aanafaalama yiimuna noyiyamakuti. Omukalo ngoka gokulonga iikulya otaku gandja ompito opo ku longwe iikulya yiimuna tayi zi momiti nomiihwa iithininiki yuulithilo. Omiti niihwa yomaludhi ga yooloka otayi vulu okulongithwa; unene ngaashi uutayi uushona nomafo ogo taga opalele okulongithwa mokulonga iikulya yiimuna. Iitopolwa yomiti mbyoka yi na ehuku ekukutu, iidhigu noku nyangushula, ihe otayi vulu okulongithwa ngele oya lumbakanithwa nawa niipameki yiilwe.

Omukalo gwokulonga iikulya mbika ogwi ikolelela kokuhola iihwa, okuhogolola uutayi uushona nomafo taga opalele okulongwa iikulya yiimuna, taga nyanyulwa nehaamala dheshina lyokunyanya e taku lumbakanithwa oondjandjo dhiihwa niipameki ya yooloka ngaashi (iikwasuuka, iikwamasita nomakunde giimeno yomoshilongo). Shika oshi ikolelela ihe kelalakano lyiikulya kutya otayi longithwa shike (oyokuhupitha oshimuna / oyoku shi pa oonkondo shi tane / oyokupa oshimuna shi simbapale).

Iikuni



Elongitho lyiikuni mokuteleka iikulya oshinima sha simana muNamibia. Otaku tengenekwa kutya ootona 550,000 dhiikuni ohadhi longithwa momumvo. Uuyelele weyalulo lyaantu muNamibia womo-2011 owa holola kutya omagumbo ga thika poopelesenda 53 ohaga longitha iikuni mokuteleka iikulya noopelesenda 46 ohadhi longitha iikuni mokuyenyeka.

Omukalo gwokulongitha iikuni ogo li pevi noonkondo. Aantu oyendji mboka yi ikolelela owala miikuni uuna taa teleke notaa yenyeke oye li momikunda. Momikunda, ondando yiikuni oyi li pevi okuyelekanitha nondando ndjoka tayi tegamenwa momashingithilo noihayi tyawa yi landithwe. Uuna wala iikuni tayi longithwa mokuyotha oonyama nomokuyenyeka, ohayi kala nondando ombwanawa tayi etele aatyayi yiikuni sha lela mondjato.

Oopaala



Oopaala odho oshilongomwa sha ha moNamibia hadhi ningwa miihwa nomomiti omithininiki dhuulithilo dha za moNamibia. Oopaala ohadhi dhikithwa omagumbo gopamuthigululwakalo nomalugumbo. Oopaala ndhoka dha pumbiwa momalandithilo odho ndhoka dhuukilila nodhina uule nuunene mbu wa halika.

Omahitululokonakono oga koleka kutya Nambia oha longo oopaala 334,000 m³ komumvo. Ashike oopaala dhongushu yoomiliyona 2 ohadhi zi kondje yoshilongo.

Iikuni ya kamwa



Iikuni ya kamwa oya zi miihwa nomomiti omithininiki dhuulithilo opo yi landithwe. Ohayi ithanwa omathindi nenge uupambu. Oshilongomwa shaNamibia shoka ngashingeyi hashi longwa kehangano lyedhina Cheetah Conservation Fund mOtjiwarongo ohashi ithanwa uutandu wiikuni (bushblocks).

Oshilongomwa shika ohashi longwa uuna iikuni tayi ndandwa e tayi kamwa. Iikuni ya kamwa ohayi longithwa unene mokuyenyeka nomiiilongadhalwa yomaihuwithopo ngaashi okuyotha onyama. Shaashi iinene molutu, iikuni mbika ohayi pi ethimbo ele yi vule iikuni mbyoka yi igiliwa.

Iihongomwa




Okuhonga iihongomwa oyo ompito oshona yokulongitha omithininiki yuulithilo. Omiti niihwa yomaludhi ga yoolokathana otayi opalele okuhongwa nomiti odhindji omipiyaganeki ngaashi Prosopis odha ha unene mokati kaahongi yiuhongomwa shaashi odha kola nodhi na ekota lyuunene wu li nawa.

Okuhonga iihongomwa miiti ogwo omukalo gwa za nale nale miitopolwa ya yooloka moNamibia nontseyo yokuhonga iihongomwa oya andjakana.

Miihongomwa ohamu zi iilongitho yina oshilonga ngaashi omaluko, omatamba nosho tuu, nenge iizandulitho. Iihongomwa otayi vulu okuetela omuntu iiyemo yi li pombanda, ihe aalandi yayo otaa nyangwanyangwa.

Iitungitho



Iitungitho ya za momiti mbyoka hayi longithwa mokutunga ohayi longwa pamikalo dha yolookathana dhili mbali; oondhopi/ omaboloka nomabolola/iipilangi. Iitungithi mbika ya yolookathana ohayi longwa muupambu wiihwa wa lumbakanithwa nomosamende ngaashi oondhopi dha thethengwa nenge dhoombululu, omabolola nomakuma gomaboloka. Iitungitho mbika ohayi longithwa okutunga kondje, okutopola, okutulitha mo omabolola, okutula mo oolaka, okutula mo uundhopi wokuzandula ekuma, okutula mo ontala, okukoleka okayungulita, tayi zi unene miipilangi yuunene wopokati.

Iilongitho otayi vulu okuningwa taku lumbakanithwa uupambu wiiti noopulastika. Iilongitho ya tya ngaaka ohayi longwa montsi ya za mokusaaha nomoopulastika notayi vulu okulongithwa onguutyelisa womakuma nenge wiipilangi.

Uupambu wiihwa



Okulongitha omithininiki yuulithilo mokweetapo olusheno oyo ompito ombwaanawa tayi vulika muNamibia. Omiti niihwa iiyetithina ohayi tetwa moku longitha omashina omanene no ku nyanyulwa muupambu mbu wayeleka. Uupambu mbuka ohau vulu okulongithwa okutemitha moofabulika nokweeta po olusheno.

MuNamibia omu na omahangano gaali taga longitha nale olusheno lwiikuni (Ohorongo cement noNamibia brewery (Ombuulaye). Ehangano lyolusheno Nampower nalyo otali tala ngele otali vulu okulongitha olusheno talu zi miikuni ndono talu tsu kumwe nomulandu gwaNamibia omupe opo gwa longekidhwa gwokulonga olusheno talu zi moonzo dhopaushitwe.